

दिनांक : 03.03.2026

समय : 18.45 बजे

- प्रधानमंत्री नरेन्द्र मोदी कह्यो-मजबूत माली व्यवस्था सागे भारत, दुनिया सारू उम्मीद री किरण बण्योडो हैं
- प्रदेश मांय बेगो ई एच-पी-वी टीका लगावण रो अभियान सरू कर्यो जावेलं
- राज्य मांय आज रंग अर उमंग रो पर्व धुलण्डी पारंपरिक हरख उमाव सागे मणायी ज्यो-केई हलकां मांय रंग काल खेल्यो जावेलं
- जयपुर मांय 5 मार्च ने व्हेवण वाळी ब्रिक्स देशां री खास मीटिंग टळीं

000

प्रधानमंत्री नरेंद्र मोदी कह्यो है के भारत मजबूत माली व्यवस्था सागे दुनिया सारू उम्मीद री किरण बण्योडो हैं आज बजट पाछे री एक वेबिनार मांय श्री मोदी कह्यो के भारत कने ई दिशा मांय खास भूमिका निभावण रो मौको हैं

.....

प्रधानमंत्री कह्यो के भारत केई देशां सागे मुक्त व्यापार समझौता कीना है अर देश सारू मोकळा मौका बण गया हैं श्री मोदी उद्योगां ऊं अनुसंधान अर विकास मांय निवेश बधावण अर गुणवत्ता माथे ध्यान देवण बाबत् कह्यो प्रधानमंत्री कह्यो के ई मिशन रो मकसद देश ने बेहतर बायोफार्मा अनुसंधान अर विनिर्माण मांय अगाडी बणावणो हैं

000

प्रदेश री टाबरियां ने सर्वाइकल कैंसर री बीमारी ऊं बचावण सारू बेगो ई पी.वी.सी. टीका लगावण बाबत् नाम मंडावण रो काम सरू कर्यो जावेलं अभियान रा पहला दौर मांय 14 साल री उम्र पूरी कर चुकी अर 15 साल ऊं कम उम्र री टाबरियां रे अ टीका लगाया जावेलं टीका लगावण रो काम देख रह्या स्वास्थ्य विभाग रा परियोजना निदेशक डॉ. रघुराज सिंह आकाशवाणी ने बतायो के सगळा जिला अस्पतालां, सामुदायिक स्वास्थ्य केंद्रां अर प्राथमिक स्वास्थ्य केंद्रां माथे टीका लगावण री व्यवस्था करी जा रही हैं वे बतायो के यू-विन एप या वेबसाइट माथे नाम मंडाया जा सकेलां

000

भारतीय विशिष्ट पहचान प्राधिकरण-यूआईडीएआई देशभर री एक लाख तीन हजार ऊं बत्ती स्कूलां मांय आधार कार्ड रा जरूरी बायोमीट्रिक सत्यापन रो काम पूरो कर लीनो हैं इलेक्ट्रॉनिक्स अर सूचना प्रौद्योगिकी मंत्रालय रे मुजब, ई खास अभियान रे जरिये करीब एक करोड़ 20 लाख स्कूली विद्यार्थियां ने वां री स्कूल मांय ई आधार अपडेट करण रो सुबीतो दियो ज्यो हैं ध्यानजोग है के यूआईडीएआई लारला साल सितंबर महीना मांय स्कूली बच्चां सारू आधार अपडेट करण रो अभियान चलायो हों

आधार मांय बायोमीट्रिक जानकारी अपडेट रेहवण ऊं विद्यार्थियां ने न्यारी-न्यारी सरकारी योजनावां अर वजीफा रो फायदो लेवण मांय आसानी व्हेलां इण ऊं नीट, जेईई अर सीयूईटी सरीखी प्रतियोगी परीक्षावां सारू नाम मंडावण रा काम मांय ई खास तौर ऊं मददगार साबित व्हेलां

000

रक्षा मंत्रालय भारतीय तटरक्षक बल अर नौसेना ने और ताकतवर बणावण सारू 5 हजार करोड़ रुप्या ऊं बत्ता रा रक्षा करार माथे सही कीनी हैं रक्षा सचिव री मौजूदगी मांय नई दिल्ली मांय करी ज्या आं करार रा तैत बेंगलुरु री हिंदुस्तान एयरोनॉटिक्स लिमिटेड कम्पनी ऊं बेहतर किस्म रा 6 हल्का हेलीकॉप्टरां री खरीदी करी जावेलं 2 हजार 900 करोड़ रुप्या ऊं बत्ता खर्च वाळा आं हेलीकॉप्टरां ऊं देश री समुद्री सरहद अर मछुआरां री हिफाजत और मजबूत व्हे सकेलां ई सागे ई भारतीय नौसेना रा जंगी जहाजां ने हवाई हमलां ऊं बचावण सारू रूस सागे 2 हजार 182 करोड़ रुप्या री जमीन ऊं हवा मांय मार करण रो बूतो राखण वाळी मिसाइलां री खरीद रो करार करी ज्यो हैं

0000

प्रदेश मांय आज रंग अर उमाव रो पर्व धुलण्डी हरख-उमाव सागे मणायी ज्यो लोग एक-दूजा ने अबीर-गुलाल लगा र होळी री शुभकामनावां दीनीं चूरू मांय जनता सागे जनप्रतिनिधि ई फाग रा गीतां बीच रंगां रा त्यौहार मांय शामिल व्ह्यां जैसलमेर रा ऐतिहासिक सोनार किला मांय सदियां जूनी रीत मुजब 'बादशाह अर शहजादा' री झांकी निकळी ज्यो डोल-नगाड़ा बजावण सागे निकळी आ झांकी

निरखण सारू मोटी मांय परदेशी सैलाणी ई मौजूद रह्या, ज्यां सारू होटलां मांय हर्बल गुलाल अर आर्गेनिक रंगां रा खास इंतजाम करी ज्यां झुंझुनू रा श्री नगर नरेश बालाजी मिंदर मांय सात सौ किलोग्राम फूलां ऊं होळी खेळी ज्यी, जठे भजनां सागे जातरु एक-दूजा माथे फूल बरसा र भक्ति अर उल्लास सागे पर्व मणायों करौली मांय चन्द्र ग्रहण रा असर अर वठे री मान्यता रे कारण आज थोड़ा-घणा लोग ई धुलण्डी मनार्यीं त्यौहार रे दौरान शांति अर हिफाजत तैय करण सारू पुलिस चाक-चौबंद हैं पुलिस महानिदेशक राजीव शर्मा जनता ऊं भाईचारा सागे त्यौहार मनावण अर व्यवस्था बणायी राखण मांय पुलिस री मदद करण री अपील कीनी हैं

.....

राज्य मांय काल ई केई ठौड़ां धुलंडी मानता थकां रंग खेल्यो जावेलां

000

चांद ने ग्रहण लागण रा सूतक अर असर रे कारण प्रदेश मांय आज आस्था रा केंद्रां अर मिन्दरां रा पट बंद रह्यां चूरू मांय संवारे ऊं ई मिन्दरां रा पट अर खास बाजार बंद रह्या, जिण ऊं रोजादारां ने जरूरी सामान री खरीदी मांय थोड़ी परेशानी रो सामो करणो पड्यो पाली ज़िला रा मिन्दरां मांय ई रोजीना व्हेवण वाळी पूजा-अर्चना टाळ दीरीजीं ज़िला रा जवाई अर दूजा हलकां मांय मोटी तादाद मांय देशी-परदेशी सैलानी पूग रह्या है, जठे ग्रहण खत्म व्ह्या पाछे खास धार्मिक अनुष्ठान राख्या जावेलां भरतपुर मांय ई चंद्र ग्रहण रे कारण मिन्दरां रा पट बंद व्हेवण ऊं जातरु मिन्दरां सामी बैठ र ई ठाकुरजी रो गुणगान कीनीं

000

कोटा ज़िला रा सांगोद मांय काल ऐतिहासिक न्हाण लोकोत्सव सारू व्हेलां पाँच दिन रा ई उत्सव रा पहला दिन 'घूघरी' रो जुलूस निकाळ्यो जावेलां ई साल हाईटेक स्वांग रे जरिये वठे रा कलाकार नुवी तकनीक रे जरिये न्यारा-न्यारा सामाजिक मुद्दां माथे आधारित झाँकियां बणायी हैं पाँच अर छह मार्च ने चौधरी पाड़ा अखाड़ा री ओर ऊं 'बारह भाला' अर 'बादशाह री सवारी' निकाळी जावेलां आठ अर नौ मार्च ने चौबे पाड़ा अखाड़ा री ओर ऊं ऐड़ा ई कार्यक्रम राख्या जावेलां

000

ब्रिक्स देशां रा वित्त मंत्रियां अर केंद्रीय बैंक रा गवर्नरां री जयपुर मांय 5 मार्च ने व्हेवण वाळी खास मीटिंग टाळ दीरीजी हैं पश्चिम एशिया मांय बधती तणा-तणी रे कारण अंतरराष्ट्रीय हवाई गेलां माथे पड्या असर अर हिफाजती हालात ने ध्यान राखता थकां फ़ैसलो करी ज्यो हैं इण ई कारण केंद्रीय माध्यमिक शिक्षा बोर्ड-सीबीएसई ई पश्चिम एशिया हलका मांय 5 अर 6 मार्च ने व्हेवण वाळी 10वीं अर 12वीं री परीक्षावां फिलहाल टाळ दीनी हैं

000

मुख्यमंत्री मंगला पशु बीमा योजना कोटपूतली-बहरोड़ ज़िला रा पशुपालकां सारू ई घणी फायदेमंद सबित व्हे रही हैं योजना रा तैत, पशुपालकां ने माली हिफाजत देवण सारू ढांढा-ढोरां रो मुफ्त बीमो ई कर्यो जा रह्यो हैं एक जन आधार कार्ड ऊं दो गायां, दो भैंस्या या दस भेड़ां, बकरियां या ऊंट रो बीमो करायो जा सके हैं

बीमो करायोड़ा जिनावर री मौत री सूरत मांय पशुपालक ने बीमा कंपनी री ओर ऊं चालीस हजार रुप्या ताई री मदद दी जावे हैं पशुपालन अधिकारी रामनिवास यादव बतायो के ज़िला मांय हाल ताई पन्द्रह हजार ऊं बत्ता पशुपालक नाम मंडाया हैं

000

प्रदेश मांय पारो चढ़बा सागे ई अब गर्मी रो असर बधबा लाग्यो हैं राज्य रा केई ज़िलां मांय दिन री बगत पारो 35 डिग्री सेल्सियस ने पार कर गयो है, जद के रात ने ई तापमान 20 डिग्री सेल्सियस ऊं ऊंचो नाप्यो जा रह्यो हैं राज्य रा आतूणी हलका मांय गर्मी रो असर बत्तो महसूस कर्यो जा रह्यो हैं मौसम केंद्र जयपुर रे मुजब आवता एक सप्ताह मांय गर्मी रो असर और बधबा रा आसार हैं

000

कोटा-बूंदी ग्रीन फील्ड हवाई अड्डो बणावण रा काम री नींव 7 मार्च ने राख्यी जावेलां मुख्यमंत्री भजनलाल शर्मा रो इण री नींव रखण रो कार्यक्रम हैं इण ने ध्यान राखता थकां ऊर्जा मंत्री हीरालाल नागर कार्यक्रम री ठौड़ शम्भुपुरा रो दौरा कर र व्यवस्थावां रो जायजो लीनीं वे कोटा अर बूंदी रा ज़िला कलेक्टर अर एस.पी. सागे कार्यक्रम री तैयारियां रा बारा मांय विगतवार बातचीत कीनीं

000